

26. april

Isumaginnittoqarfiup aqunneqarnera aaqqissuussaaneralu pillugit Inatsisartut inatsisissaat nr. xx, xx.xx. 2016, tamatumuuna allangortillugu isumaginnittoqarfiup aqunneqarnera aaqqissuussaaneralu pillugit Inatsisartut peqqussutaat. (Kommunit isumaginninnikkut ingerlatsinerisa atorunnaarsinneqarsinnaanerat)

Siumumiit inatsisip allangortinneqarnissaanut Naalackersuisut allannguutissatut siunnersuutaat imak oqaaseqarseqarfigissavarput.

Siumut isumaqarpoq inunnik isumaginninnikkut sullissinerit ikiorsiisarnerillu tamarmik, naatsorsueriaatsit naleqassutsimik aallaaveqartut sakkugalugit, ingerlaavartumik nalilersorneqartariaqartut naleqqussartuarneqarlutillu. Taamaaliornikkut nunatsinni sullinneqartunut tamanut sullissineq pitsaanerpaaq naligiinnerusorlu anguneqassaaq, tamannalu ineriartortinneqassaaq Namminersorlutik Oqartussat kommunillu suleqatigiinnerisigut.

Taamaattumik naalackersuisup inatsimmut akisussaasutut sukaganerusumik sakkortuumillu qisuariarluni piffissami qaangiuttumi qisuariarnerata oqallisaanera Siumumiit iluarisimaapparput.

Siumut isumaqarpoq inunnik sullissinermi sulisorisat tamarmik ataavartumik pikkorissartinneqartarnissaat periarfissaajuartariaqartoq. Taamatuttaaq Siumut isumaqarpoq sullissinermi ilisimasani katersuiffik kommunini sullissiniarnermi iluaqutaasussaaq pilersinneqartariaqartoq.

Isumagineqarnissamik pisariaqartitsisut imminut ikiorsinnaanngorlugit ikiorserneqartarnissaat Siumup politikkerisaa aamma kommunerujussuit siunnerfigisariaqarpaat.

Ukiuni kingullerni kommunerujussuit atulernerisa kinguneragut illoqarfinni anginerusunut eqiterutitsinerujussuup kinguneraa innuttaasut kommunini saaffiginnittarnerat ajorseriarnerisigut. Tamanna kommunerujussuit atuutilernissaminnut aallaqqaammulli siunertarisimangilluinnarsimagaluarppaa. Pilersaarutit uniorlugit maanna ingerlasoqarnera kimilluunniit miserratigineqarsinnaangilaq.

Akuersaaruminaapporlu saaffiginnittut amerlanertigut qitiusumut saaffiginnissutaat ingerlanneqaqqaartuaannartarmata. Uffa aningaasanik sipaarniarnermik aallaavilimmik kommunerujussuangerneq aallaartinneqaraluartoq. Tamanna tunngavimmigut eqqortuunngilaq, ajuusaarnarporlu inuit atukkamikkut ajorseriaateqartumik eqqugaammata. Siumumiit tamanna attannissaa akuersaanngilarput. Taamaatumillu komuunerujussuangerup nalilersuiffiginissaa naalakkersuisunut sakortuumik kaammatuutigaarput.

Nunarput siammasissorujussuuvoq. Sumiiffinni atukkat, ileqqut, inooriaatsillu imminnut sanillersuunneqarsinnaangillat. Illoqarfinni mikinerusuni innutaasunik sullinneqarneq nukilaalligaluttuinnartutut ittup nassatarivaa nunaqarfinni atukkat pillugit ajornartorsiutit ajorsigaluttuinnarnerannik. Taamaattumik maannakkut Naalakkersuit ajornartorsiutip aaqiiviiginiarnerani allannguutissatut siunnersuutaat Siumumiit tapersorsorluinnarparput.

Pisut ilinniarfissaraagut, kukkussutillu qanoq iliuuseqarfiginissaannut tappinnerulersimavugut. Tamanna pisoq pillugu innuttaasut Inunnik Isumaginnittoqarfiup iluani iluarsisarialinnut ataatsimoorfeqarnissarput sukataaruttariaqarparput, **peqatigiilluta**. Nalunngilarpummi allat kukkussutaannut, iliuuserisaannut allatigullu torrallassimanngisaannut nukiit kisiisa atussagutsigit immitsinnut nukillaarsaannartussaavugut. Inuiaat nunarujussuarmi inuusugut amerlanngitsut, napatissagutta ilorraallu tungaanut qimussagutta nammaqatigiimmik ikioqatigiittariaqarpugut. Pingaartumik politikkip iluani sinaakutissanik inatsisiliortilluta.

Allanngortissinnaangisagut nukinik atuiffiginissaat naleqquttuunngilaq, allanngortissinnaasagulli pimooruttariaqarpagut. Siumumiit upperaarput Naalakkersuisut allannguutissatut siunnersuutaat aqutigalugu ilorraap tungaanut sangusoqarsinnaassasoq. Matumuuna inuit atugaat pineqarput, tamannalu naalakkersuisuniit iliuuseqarfiginiarneqarnera nuannaarutigeqaarput.

Kommunerujussuit atuutilinnginneranni innuttaasut qulaatiinnarlugit aalajangerneq innuttaasorpasuarput kingunerlutitsinera ullumikkut arlalitsigut takoreerparput. Pilersaarutit suulluunniit qanorluunniit kusanartigisumik takorluugaallutik aallunneqaraluarpata innuttaasut qanimut saaffissatuaat annermik tassaavoq kommune. Kommunellu tamakkiisumik qanimut sullissinissamat ingerlatsitissinnaangippat, equnganeq annertoq pilertussaasoq naatsorsuutigisinnaavarput, tamannalu aamma

sumiiffinni arlalinni pereertoq takoreerparput. Nagguitsigut ajortoqaraangat ilisimareerparput pilutat sinneri pitsaasumik inerititaqangaarnej ajortut. Tamanna assersuutigissallugu tulluurtuuvoq.

Meeqqanut inuusuttunullu tunngasut suliassanngortitat qaleriaat ukiuni arlalinni uninngasarsimasut tusareerpagut. Tamanna pisussaaffimmik naammassinninnaannginnermik takutitsivoq. Tamatuma ersarissippaa qanoq Inunnik Isumaginnittoqarnerup iluani sulinikkut ajornartorsiortigisoqarnerup annertussusianik. Ajornartorsiut imak annertugisimappat allaat meeqqap inuuneranik ikiorneqanngitsoorneranik kinguneqartumik tamanna ajorsarnertut taaneqarsinnaavoq. Meeqqat Illersuisuata angalasimanerminik qisuariarnera assut Siumumiit nuannaarutigalugu pattalaarusupparput.

Nersualaarparput sapiissuseq taamak ersaritsisoq anersaaralugu pimoorussimmat. Maannakkullu Naalackersuisut inatsisitigut allannguutissatut siunneruinerat akisussaassuseqarnermik tiguserusunnertut isigalugu Siumumiit tapersorsorluinnarparput. Neriulluta Inunnik Isumaginnittoqarnerup iluani sulisunik ilinniarluarsimasunik amerlisaanikkut, akissarsiatigullu naleqqussaannermik nassataqartumik aqqissuussineq naammassineqarsinnaajumaartoq.

Isumaginnittoqarfiup aqunneqarnera pillugu iliuusissatut inatsisikkut saqqummiusaaq sukumiisumik suliassaavoq pingaaruteqarluinnartoq, Siumullu isumaqarpoq suleqatigiinikkut aqqiiniarnerit ingerlanneqassasut allatulli ajornarsisimappat sakkortunerusumik aqutsinissaaq tikiqqartariaqalersimassappallu akisussaafik naalackersuisumiippoq.

Inatsisitigummi iliuutsit Naalackersuisup akisussaaffigai taamaattumik inatsississatut siunnersuut aappassaaneernejartinnani ataatsimiititaliami susassaartumi suliarineqarnissaa Siumumiit inner-suupparput

Laura